

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. केंद्री गृह सचिव होरें औंदी श्री अमरनाथ जी दी यात्रा दी सुरक्षा सरबन्धी तैयारियें दा जायजा लैता।
 2. भारतीय विद्यार्थिएं गी ईरान थवां अरमीनिया आहले रस्ते राएं सुरक्षित कड्डेआ जा'रदा ऐ। मुख्यमंत्री होरें 178 हज यात्रिएं दे पैहले जत्थे दा कल संझा श्रीनगर ब्हाई अड्डे पर सौआगत कीता।
 3. जल शक्ति मंत्री जावेद अहमद राणा होरें पीर पंचाल खिते च पानी दी आपूर्ति सरबन्धी योजनाएं दी श्रीनगर सिविल सचिवालय च समीक्षा कीती।
 4. जम्मू-कश्मीर दी प्रीमियम चैरी साउदी अरब च पुज्जी गेई जेदे कन्नै भारत दे कृषि निर्यात गी बढ़ावा थहोग।
 5. हाशियें पर रौहने आहले लोकें गी सशक्त बनाने लेई SMILE योजना गी लागू करने आहला रियासी जिला जम्मू खिते च पैहली ते प्रदेश च दुए थाहर पर ऐ।
- हून खबरें दी तफसील कन्नै श्रुति खजूरिया।

<><><><><><>

Amarnath-Yatra

केंद्री गृह सचिव गोविंद मोहन होरें औंदी श्री अमरनाथ जी दी यात्रा दी सुरक्षा सरबन्धी तैयारिएं दा इक उच्च सतह दी बैठक दौरान जायजा लैता। एह बैठक श्रीनगर पुलिस मुख्यालय च होई जेदे च प्रदेश दे मुख सचिव, डीजीपी, सेना, खुफिया एजेंसिएं दे वरिष्ठ अधिकारी ते होर सरबन्धी अफसर शामिल होए। बैठक दा मकसद यात्रा लेई सुरक्षा ते तैयारिएं सरबन्धी कार्य योजना गी मुकदा रूप देना हा। वरिष्ठ अधिकारिएं योजना गी बड़े ध्यानै कन्नै ते सौहगा होइए तैयार करने दी जरूरता पर जोर पाया तां जे पैदा होई सकने आहली कुसै बी चुनौती कन्नै निब्वड़ेआ जाई सके। सब्बन सरबन्धी एजेंसिएं पर नेइमां तालमेल बनाइए कम्म करने लेई आखेआ गेआ।

<><><><><><>

Ramban Amarnath-Yatra

औंदी श्री अमरनाथ जी दी यात्रा दे मददेनजर रामबन जिला प्रशासन ते पुलिस मैहकमे आसेआ तैयारिएं गी मुकदा रूप दिता जा'रदा ऐ तां जे सालाना यात्रा गी सुचारू ते सुरक्षित ढंगै सिर करोआया जाई सके। रामबन दे एसएसपी कुलबीर

सिंह होरें सुरक्षा बंदोबस्तें गी निगगर बनाने लेई गलाया। उनें ट्रैफिक पुलस दी तैनाती, खास करी उनें थाहरें जित्थे शिड़क निर्माण जारी ऐ, पर करने लेई आखेआ। यात्रा दी आवाजाई गी सुचारू बनाने लेई कट ऑफ टाइमिंग्स दी अमलावरी यकीनी बनाने लेई आखेआ गेआ ऐ। सारे सी.सी.टी.वी कैमरे ते सांझे नियंत्रण कक्षें दे कम्म करने पर जोर पाया गेआ तां जे सब्बनें बश्कार तालमेल बनी सकै। इस बारें होर जानकारी दिंदे होई एसएसपी रामबन कुलबीर सिंह होरें आखेआ।

<><><><><><>

Students-CM

जम्मू-कश्मीर थवां जेड़े बच्चे ईरानच पढ़ा रदे न, गी Armenia आहले रस्ते राएं सुरक्षित कइडेआ जा रदा ऐ। प्रशासन नै इस गल्ला दी तस्दीक कीती ऐ जे एहदे लेई इंतजाम कीते गेन। प्रशासन पूरी कोशिश करा'रदा ऐ जे एह बच्चे तौले थवां तौले घर परतोई औन। इस बारें बोलदे होई मुख्मंत्रि उमर अब्दुल्ला होरें आखेआ।

<><><><><><>

Haji-Pilgrims

मुख्मंत्रि उमर अब्दुल्ला होरें कल संझा श्रीनगर बहाई अइडे पर 178 हज यात्रिणं दे पैहले जत्थे दा सुआगत कीता। मुख्मंत्रि होरें हज करियै वापस परतोने आहलें दा गर्मजोशी कन्नै सुआगत कीता ते पवित्र हज यात्रा सफलतापूर्वक पूरी करने पर उनेंगी बधाई दिती। हज यात्रियें कन्नै गल्लबात करदे होई मुख्मंत्रि होरें उंदी सुरक्षित वापसी पर खुशी जाहिर कीती ते उन्दे सफर लेई कीते गेदे इंतजामें दी सराहना कीती। हज यात्रिं अनी यात्रा च बवस्थित स्थूलतां उपलब्ध करोआने लेई सरकार दा धन्नवा कीता। इस मौके पर बोलदे होई मुख्मंत्रि उमर अब्दुल्ला होरें आखेआ।

<><><><><><>

Rana Jal Shakti

जल शक्ति मैहकमे दे मंत्री जावेद अहमद राणा होरें पीर पंचाल खिते च पानी दी आपूर्ति दे बुनियादी ढांचे गी मजबूत करने लेई इक महत्वपूर्ण गैस पुट्टदे होई सिविल सैक्ट्रेट श्रीनगर च इक उच्च सतह दी समीक्षा बैठक दी अध्यक्षता कीती। इस बैठक च जारी पानी आपूर्ति योजनाएं दा आंकलन करने, योजना च लगगा रदे चिर गी दूर करने ते बिना रुकावट दे पानी दी उपलब्धता गी यकीनी बनाने पर ध्यान दिता गेआ। मंत्री होरें खासतौरा पर इनें योजनाएं दी रोजाना जांच, समुदाय गी भागीदारी ते सावधानी कन्नै योजना बनाने दी जरूरतें पर जोर भरेआ। सरकार दी बचनबद्धता गी फी दोहरांदे होई पीर पंचाल खिते दे बसनीकें गी साफ पीने आहला पानी उपलब्ध करोआने लेई जारी जत्नें दा भरोसा दोआया।

<><><><><><>

Cheries Saudi Arabia

जम्मू-कश्मीर थमां पैहली बारी प्रीमियम चैरी साउदी अरब च पुज्जी गई ऐ जेड़ा भारत दे कृषि निर्यात च इक महत्वपूर्ण मील दा पत्थर साबत होआ ऐ। उद्घाटन करने दे मगरा चैरी हून साउदी अरब च खरीदारें गी मकामी बजारें च उपलब्ध होआ करदी ऐ। इक सोशल मीडिया पोस्ट च रियाद च भारती दूतावास नै चैरी दे औने ते इंदा उद्घाटन करने दी घोषणा कीती ऐ। बन्ज बपार दी काउंसलर मनूस्मृति हुंदी अगुवाई च भारतीय दूतावास दी बपार सरबन्धी टीम नै इस खेप गी हासल कीता ते इस उत्पाद गी लांच कीता। एह विकास भारत थमां मती गुणवत्ता आहली पैदावार दी बधदी वैश्विक मंग गी दर्शादा ऐ ते भारत ते साउदी अरब बश्कार बपार सरबन्धी रिश्तें गी होर मजबूत करदा ऐ।

<><><><><><>

Reasi-Smile

हाशिये पर रौहने आहले लोकें दे सशक्तिकरण दी दिशा च इक बड़्डी गेंस दे तौरा पर जम्मू-कश्मीर च स्माइल योजना गी लागू करने आहला रियासी जिला श्रीनगर दे मगरा दुई थाहरा पर ऐ। समाजी न्यास ते सशक्तिकरण मंत्रालय आसेआ शुरू कीती गेदी इस पहलकदमी दा मकसद भिख मंगने आहलें गी परतियै बसाना ते सशक्त बनाना ऐ। डिप्टी कमिशनर निधि मलिक होरें योजना गी खीरी रूप देने लेई इक बैठक दी अध्यक्षता कीती जेदे च इस परियोजना दी अगुवाई करने लेई प्रयास गैर सरकारी संगठन दा चयन कीता गेआ। इस योजना च खासतौरा पर बच्चें लेई शिक्षा ते हुनर निर्माण उपपर ध्यान दिता जाग।

<><><><><><>

Special Feature 11 Years

11मां अंतरराष्ट्री योग दिवस इस हफ्ते मनाया जाग। आकाशवाणी समाचार योग बारै इक खास फीचर लेइयै आया ऐ जेदे च भारती परम्परा थवां हुन तगर ऐसे वैश्विक अभियान बनने बारै दी यात्रा गी दर्शाया गेआ ऐ। भारती संस्कृति च रचे-बसे दा योग अज्ज पूरी दुनिया च अपनाया जा'रदा ऐ जेदे थवां पतंजलि दे सूत्रें ते आधुनिक गुरुएं योग गी अगगे पजाया ऐ। 2014 च संयुक्त राष्ट्र आसेआ इसी अपनाने ते 21 जून गी पूरी दुनिया च इसी अंतरराष्ट्री दिवस मनाने दी इक यात्रा जारी ऐ। प्रधानमंत्री नरेंद्र मोदी होरें इस बारै प्रस्ताव पेश कीता हा जिसी अपनाई लैता गेआ। अज्ज योग सेहत गी बढ़ावा देने, आपसी सौहार्द ते आत्म शांति आहली भेठा लोकें गी लेई जा करदा ऐ।

<><><><><><>

Yoga-Samba

औंदे 11में अंतरराष्ट्रीय योग दिवस दे सरबंथै च जम्मू-कश्मीर च बी तैयारियां जोरें-शोरें कन्नै जारी न। आयुष मैहकमे नै साम्बा जिला प्रशासन कन्नै रलिए योग बारै इक कार्यक्रम साम्बा आहले किले च आयोजित कीता। एहदे च 180 प्रतिभागिएं हिस्सा लैता। एहदे च योग दे महत्व, शारीरिक ते मानसिक सेहत लेई योग बारै अवगत करोआया गेआ। इस कार्यक्रम च रिवायती तौर तरीकें ते आधुनिक सेहत जत्तें बश्कार तालमेल बारै बी दस्सेआ दसाया गेआ।

<><><><><><>

Pre Yoga Day Announcement

आकाशवाणी जम्मू दा क्षेत्रीय समाचार एकांश अंतरराष्ट्रीय योग दिवस दे सरबंथै च 20 जून गी 20 मिनटें दा इक खास कार्यक्रम पेश करांरदा ऐ। एहदा प्रसारण शुक्रवारें बड्डलै 9 बज्जियै 30 मिनटें पर कीता जाग। कार्यक्रम च स्हाड़े परौहने होइन मन्ने-परमन्ने दे योग माहिर ते नेचरोपैथ डॉ. नीलम शर्मा। ओह योग दे स्हाड़े जीवन च महत्व बारै अपने विचार सांझा करंगन। इस परिचर्चा दी मेजबानी करंगन स्हाड़ियां न्यूज एंकर श्रुति खजुरिया। इस कार्यक्रम गी स्हाड़े श्रोता मीडियम मीडियम वेव 303 मीटर यानि 990 किलोहर्टज ते एफएम 100.3 मेगाहर्टस पर सुनी सकदे ओ।

<><><><><><>

Weather

मौसम विभाग नै जम्मू-कश्मीर च औंदे किश दिनें दरान मौसम बदलौंदे रौहने दी पेशगाई कीती ऐ। विभाग दा आखना ऐ जे 20 जून तोड़ी ज्यादातर मौसम खुशक रौहने दी मेद ऐ पर किश-किश थाहरें पर हल्की बरखा होई सकदी ऐ। एहदे अलावा विभाग नै 21 जून थमां 22 जून तगर जम्मू खिते दे किश थाहरें पर दरम्याने दर्जे थमां लेइयै भारी बरखा पौने दी मेद बुज्झी ऐ। करसानें गी सलाह दिती गेई ऐ जे ओह इनें निम्बलें दा फायदा चुक्कन ते 20 जून तगर बरखा पौने शा पैहले अपने राई-बाई सरबंथी कम्म जारी रक्खन।

<><><><><><>

Read by: Shruti Khajruai and Shagufta Choudhary

Composed By : Varinder Kumar

Editor : Abhilasha Sharma